

# TEZAU LITURGIC

**4 IULIE**

# SLUJBA SOBORULUI SF. MUCENICI ROMANOVI DE LA MOSCOVA II



**MOSCOVA, 2000**



**Мѣсяца Іулія въ 4-й дѣнь  
Служба святымъ царственнымъ  
мученикомъ:**

**святому благовѣрному царю мученику  
Николаю, царицѣ мученицѣ Александрѣ,  
царевичу Алексію, царевнамъ Ольгѣ,  
Татианѣ, Маріи и Анастасіи,  
преподобномученицамъ княгини  
Елисаветѣ и инокинѣ Варварѣ, святымъ  
благовѣрнымъ мученикомъ царскаго  
рода и вѣрнымъ слугамъ съ ними  
убіеннымъ**

**НА ВЕЛИЦѢЙ ВЕЧЕРНИ**

**Блаженъ мужъ, первый антифонъ.  
На Господи возвахъ, стихиры на 8, гласъ 6.  
Подобенъ: Всю отложивше.**

**Яже издревле Святая Русь\* егда начатъ  
отступати отъ Создателя и Бога своего,\*  
долготерпѣливый Господь посла многія  
праведныя мужи и пророки,\* отъ нихже  
последній бысть святой праведный пастырь  
Кронштадтскій Іоаннъ,\* призывая грѣшныя къ  
покаянію,\* и возвѣщая гнѣвъ Господень на  
нераскаявшихся,\* но не послуша сихъ народъ.\*  
Тогда предаде Богъ прежде благочестивую**

зе́млю Ру́сскую ве́лимъ гоне́ниемъ на вѣру,\* я́ко да грѣ́шныя вразуми́тъ,\* вѣ́рныя же возвели́читъ и просла́витъ\* чрезъ терпѣ́ние, страда́нія и сме́рть за Христа,\* явля́я со́нмъ святы́хъ ново́мучениковъ,\* отъ ни́хже вели́кій бы́сть страстоте́рпецъ ца́рь мучени́къ Никола́й\* съ ца́рицею и ча́ды и слуги́,\* я́же ны́нѣ мо́лятся о ду́шахъ на́шихъ. [Два́жды.]

## **Гла́съ 2. Подо́бенъ: Егда́ отъ дре́ва.**

Егда́ ты́, ца́рю мучени́че,\* отъ богобо́рцевъ заклю́ченъ бы́въ,\* ве́лю ра́дость съ ца́рицею и ча́ды имѣ́лъ еси́,\* егда́ служи́тель Бо́жій посьща́ше тя,\* службу́ Бо́жию соверша́я.\* Такова́ благочестива́го ца́ря и Пома́занника Бо́жия\* мно́жайшии отъ наро́да отврати́шася,\* я́ко забы́ша сло́во Бо́жіе,\* призыва́ющее почита́ти ца́ря,\* и при́иде на вся ны́ гнѣ́въ Бо́жій.\* Сего́ ра́ди въ пока́янии зове́мъ:\* Го́споди, пода́ждь стражду́щей странѣ́ Росси́йстѣй,\* предста́тельствомъ вели́каго страстоте́рпца ца́ря мучени́ка\* отъ богобо́рныхъ изба́вленіе\* и возста́вленіе престо́ла правосла́вныхъ ца́рей.

Воспѣ́ваемъ тя́, ца́рю мучени́че,\* и многострада́льный страстоте́рпче,\* поне́же всѣ́хъ въ се́рдцѣ́ своѣ́мъ вмѣща́лъ еси́,\* я́коже Па́вель апо́столь,\* а́лчущаго насыща́я,\*

скорбящаго утѣшая, и страждущему соскорбя,\* о заблуждающихъ печалуя,\* осужденнаго злодѣя мѣлуя,\* клевету и неправду крѣтко снося,\* о вѣрѣ и благочестіи ревнуя,\* славу и богатство мѣра сего нивчтоже вмѣняя,\* паче же отягощаяся ими,\* попеченіе о мирѣ всего мѣра имѣя,\* любовію ко всѣмъ пламенѣя.\* Пріими и насъ въ сердце твое,\* о многострадальній царю и великій страсготѣрпче,\* и моли милостиваго Бога, да помилуетъ насъ,\* и подастъ намъ крѣпость подражатели твой быти.

**Ины стихиры, гласъ 6.  
Подобенъ: Всю отложивше.**

Боговѣнчанная мученице, святая царице Александро,\* кто изречетъ твое войстину евангельское житіе?\* Прешла еси отъ иновѣрія къ вѣрѣ православнѣй,\* юже воспріяла еси всѣмъ сердцемъ твоимъ,\* возлюбивши молитву, храмъ и святая таинства,\* ещѣ же поученія святыхъ отецъ,\* возрастивши чада твоя во благочестіи,\* и уготовляючи ихъ къ мученію за Христа,\* терпящи крѣтко клевету забывшихъ Бога,\* и не разумѣвающихъ истиннаго благочестія твоего,\* сего ради молимъ тя,\* моли Христа Бога, Егоже возлюбила еси,\* да спасетъ души наша.

Велія вѣра твоя,\* святая мученице царице  
Александро,\* въ горцѣмъ заточеніи отъ  
богоборцевъ бывши,\* и чаючи мученическія  
смерти,\* глагола еси сице:\* да уготовимъ себе  
къ срѣтенію небеснаго Жениха,\* Богъ  
исполняетъ и озаряетъ душу мою  
неизглаголанною радостію и тишиною,\* душа  
моя ликуетъ,\* разумьющи, яко Женихъ  
приближается,\* душа моя трепещетъ, яко Богъ  
близъ есть,\* да просимъ у Господа себѣ и всему  
міру грѣховъ прощенія,\* помолимся о  
забывающихъ молитися и о всѣхъ людехъ.\*  
Исходатайствуй, святая мученице, и намъ  
грѣховъ прощеніе,\* и велию милость.

Святый мученикъ царевичъ Алексій,\* возлюбилъ  
силу крестную.\* Сія вѣра крестная поможетъ ему\*  
безъ роптанія понести страдальческой крестъ  
неизцѣльнаго недуга\* чрезъ всю его  
маловременную жизнь,\* и съ терпѣніемъ и  
упованіемъ пріяти мученическую кончину за  
Христа.\* И нынѣ на небесѣхъ молися о насъ,\*  
вѣрою и любовію совершающихъ память твою,\*  
да подастъ и намъ Господь,\* вѣру и терпѣніе и  
любовь.

Святыя мученицы Христовы,\* царевны Ольго,  
Татиано, Маріе и Анастасіе,\* яви васъ Христось,  
яко ангелы во странѣ Россійстѣй,\* бысте бо

чистоты, любви и сострадания образъ,\* имже научитесь отъ благочестивѣйшихъ родителей своихъ,\* любовь велию имуща ко всѣмъ, наипаче ко страждущимъ,\* имже послужите, по заповѣди Христовой:\* боленъ и посѣтите Мене,\* егда же гонение, заточение и поношение наста,\* добродѣтели величайшія вѣры,\* кротости, терпѣнія и всепрощения покажете,\* воспѣвающе святыя молитвы,\* и полагающа надежду на Бога,\* взывающа ко Господу предъ иконами многими,\* яже устроите у себе,\* молящася крѣтко за враговъ,\* неповинно васъ терзающихъ и убивающихъ.\* Кротость и терпѣние ваше сердца злодѣевъ умягчаше.\* Велия ваша добродѣтели на земли,\* велия слава на небесѣхъ,\* святыя невѣсты Христовы,\* молитесь о душахъ нашихъ.

### **Слава, гласъ 8:**

Богоизбранная преподобномученице княгине Елисавето,\* егда буря безбожія на землю Русскую найде,\* сія глагола еси:\* якоже въ бури естественнѣи бывають:\* нѣцыи бѣгутъ, инѣи поражаются,\* инѣмъ же очи душевніи открываются,\* да видятъ величіе Божіе,\* тако и въ вихрь житейстѣмъ приключаются,\* душа бо твоя въ потрясеніихъ узрѣ десницу Божію:\* лютое убіение твоего мужа\* приведетъ тя къ

служенію Богу и ближнимъ:\* немощнымъ, оставленнымъ и увѣчнымъ служила еси со смиреніемъ и любовію,\* еще же воспріяла еси иноческое житіе,\* и бѣжати отъ богоборцевъ не восхотѣла еси,\* безъ страха пріимши мученическую смѣртъ за Христа.\* Мы же почитающе благоуханныя мѡщи твоя,\* усердно просимъ:\* моли о чтущихъ твоя подвиги и страданія.

**И нынѣ, богородиченъ догматикъ, гласъ тойже:**

Царь Небесный за челоуѣколюбіе на земли явился,\* и съ челоуѣки поживе,\* отъ Дѣвы бо чистыя плѡтъ пріемый,\* и изъ Нея прошедый съ воспріятіемъ,\* Единъ естъ Сынъ, сугубъ естествомъ,\* но не впостаію.\* Тѣмже совершенна Того Бога,\* и совершенна Челоуѣка воистинну проповѣдающе,\* исповѣдуемъ Христа Бога нашего:\* Егоже моли, Мати безневѣстная,\* помиловатися душамъ нашимъ.

**Входъ, прокименъ дне и чтенія три.  
Премудрости Соломоновы чтеніе.**

Праведныхъ души въ руцѣ Божіей, и не прикоснется ихъ мука. Непщевани быша во очесѣхъ безумныхъ умерети, и вмѣнися озлобленіе исходъ ихъ, и еже отъ насъ шествіе сокрушеніе;

они́ же сѹть въ ми́рѣ. Ибо предѣ́ лицѣ́мъ  
человѣ́ческимъ а́ще и му́ку при́имутъ, упова́ніе  
и́хъ безсме́ртія испо́лнено. И вмалѣ́ наказани  
бывше́, вели́кими благоде́тельствовани бу́дутъ,  
яко Бо́гъ искуси́ я и обрѣ́те и́хъ досто́йны Себѣ́.  
Яко зла́то въ горни́лѣ, искуси́ и́хъ и, яко  
всепло́діе же́ртвенное, прія́тъ я. И во вре́мя  
посѣ́щенія и́хъ возсія́ютъ и, яко і́скры по  
сте́блю, потеку́тъ: сѹдятъ язы́комъ и облада́ютъ  
люды́ми, и воцари́тся Госпо́дь въ ни́хъ во вѣ́ки.  
Наде́ющіися На́нь разуме́ютъ і́стину и вѣ́рніи въ  
любви́ пребу́дутъ Ему́, яко благода́ть и ми́лость  
въ преподо́бныхъ Его́ и посѣ́щеніе во  
избра́нныхъ Его́.

### **Царствѣ́ третіихъ́ чте́ніе.**

Ста́ Соломо́нь предѣ́ лицѣ́мъ олтаря́ Госпо́дня,  
предѣ́ всѣ́мъ собо́ромъ Изра́иловымъ, и воздви́же  
руцѣ́ свои на не́бо, и рече́: Господи́ Бо́же  
Изра́илевъ, нѣ́сть яко́же Ты́ Бо́гъ на небеси́ горѣ́,  
и на земли́ низу. А́ще не́бо, и не́бо небесе́ не  
довла́ютъ Ти́, кольми́ па́че хра́мъ сей, его́же  
созда́хъ Имени́ Твоему́? и да при́зриши на  
моли́тву мою́, Господи́ Бо́же Изра́илевъ,  
послу́шати моли́твы, е́юже мо́лится ра́бъ Тво́й  
предѣ́ Тобо́ю къ Тебѣ́ дне́сь: Да бу́дутъ о́чи Твои́  
отве́рсты на хра́мъ сей́ день и но́щь, на мѣ́сто  
сіе́, о́ немже́ рекль еси́: бу́детъ Имя́ Моё́ та́мо, на

услы́шаніе моли́твы, е́юже мо́лится раба́ Тво́й на мѣстѣ́ се́мь де́нь и но́щь. И услы́шиши моли́тву раба́ Твоего́ и люде́й Твои́хъ Изра́иля, о́ нихже помо́лятся на мѣстѣ́ се́мь, и Ты́ услы́шиши на мѣстѣ́ обита́лища Твоего́ на небеси́, и сотвори́ши и поми́луеши.

### **Проро́чества Иса́инна чте́ние.**

Да возра́дуется ду́ша моя́ о Го́сподѣ, облече́ бо мя въ ри́зу спасе́нія, и оде́ждею весе́лія одѣ́я мя, я́ко жениху́ возложи́ мнѣ́ вѣне́ць, и я́ко неvě́сту украси́ мя красо́тою. И я́ко земля́ растя́щая цвѣ́тъ сво́й, и я́ко вертогра́дъ сѣ́мена сво́я прозяба́етъ: та́ко возра́ститъ Го́сподь пра́вду, и весе́ліе предъ́ всѣ́ми язы́ки. Си́она ра́ди не умолчу́, и Іерусали́ма ра́ди не попу́щу, до́ндеже изы́детъ я́ко свѣ́тъ пра́вда моя́, и спасе́ние моё́ я́ко свѣ́тило разжже́тся. И узря́тъ язы́цы пра́вду Твою́, и ца́рие сла́ву Твою́, и прозову́тъ Тя́ и́менемъ но́вымъ, и́мже Го́сподь имену́етъ е́. И бу́деши вѣне́ць доброты́ въ руцѣ́ Го́сподни, и диа́дима ца́рствія въ руцѣ́ Бо́га Твоего́. И прозове́шися ктому́ оста́вленъ, и земля́ твоя́ ктому́ не нарече́тся пу́ста: тебѣ́ бо прозове́тся во́ля моя́, и земля́ твоя́ вселенна́я, я́ко благоволи́ Го́сподь въ тебѣ́, и земля́ твоя́ вкупѣ́ населі́тся. И я́коже живя́й ю́ноша съ дѣ́вою, та́ко поживу́тъ сы́нове тво́й съ тобо́ю. И бу́детъ, я́коже раду́ется

женихъ о невѣстѣ, тако возрадуется Господь о тебѣ.

**На литіи стихи́ра хра́ма, и му́чениковъ,  
гласъ 3:**

Сла́ва и́стинная страда́ніе е́сть,\* тако́ бо рече́  
Госпо́дь:\* ны́нѣ просла́вися Сынъ Человѣ́ческой,\*  
сла́вою Сво́ею на крестѣ́ страда́ніе имену́я.\* Сея́  
крестны́я сла́вы сподо́бишася ца́рственни  
му́ченицы,\* иже подража́ша страсте́мъ  
Спасовымъ,\* сего́ ради возлю́би ихъ Христо́съ,\*  
и возвели́чи на небесе́хъ,\* да мо́лятся о душа́хъ  
нашихъ.

**Сла́ва, гласъ 8:**

Не су́ть совѣ́ти Бо́жии, я́коже совѣ́ти  
человѣ́честии,\* и не я́ко путе́ челове́честии путе́  
Бо́жии, глаго́летъ Госпо́дь,\* сего́ бо смиря́етъ и  
сего́ возно́ситъ,\* Госпо́дь мертви́тъ и живи́тъ,\*  
убо́житъ и богати́тъ,\* возста́вляетъ отъ земли́  
убо́га,\* престо́ль сла́вы дая́ ему́.\* Тако́ престо́ль  
сла́вы угото́ва Госпо́дь\* возлю́бленному Сво́ему  
сла́вному му́ченику царю́ Никола́ю,\* воздая́ ему́  
за благо́честіе,\* и по крестнѣ́мъ путе́ содѣ́лавъ  
его́ жива́ на небесе́хъ,\* я́ко да мо́лится за наро́дъ  
сво́й,\* да попече́ніе воспрі́емемъ о ца́рствіи  
небе́снѣ́мъ,\* и о спасе́ніи ду́шъ нашихъ.

## **И нынѣ, богородиченъ, гласъ тойже:**

**Безневѣстная Дѣво,\* Яже Бога неизреченно  
заченши плотию,\* Мати Бога Вышняго,\* Твоихъ  
рабовъ мольбы прими, Всенепорочная,\* всѣмъ  
подаючи очищеніе прегрѣшеній,\* нынѣ наша  
моленія приемлющи,\* моли спастися всѣмъ намъ.**

**На стиховнѣ, стихиры, гласъ 8.**

**Подобенъ: О, преславнаго чудесе!**

**Не о славу царства земнаго попеченіе имѣлъ  
еси,\* славный мучениче царю Николае,\* егда  
вѣнчаніе на царство и мѣромъ помазаніе  
воспріялъ еси,\* но помышлялъ еси о славу  
Божіей и о Царствѣ небесномъ,\* въ молитвѣ  
предъ народомъ глаголя:\* Владыко мой и  
Господи,\* настави мя и вразуми въ великомъ  
служеніи семъ,\* да будетъ со мною Твоя  
божественная премудрость,\* послѣ ю съ небесъ  
святыхъ Твоихъ,\* да разумю, что есть угодно  
предъ очима Твоима,\* и что есть право по  
заповѣдемъ Твоимъ,\* буди сердце мое Тобою  
управлено,\* еже вся устроить ко славу Твоей,\* и  
къ пользе душевнѣй врученныхъ мнѣ людей.\* Сія  
молитва угодна бысть предъ Богомъ,\* и нынѣ,  
яко мученикъ, не престаи молити Бога о пользе  
душевнѣй твоихъ людей,\* яко да милостивъ  
будетъ къ нимъ,\* подая намъ оставленіе  
грѣховъ,\* миръ и велию милость.**

**Стихъ:** Вознесохъ избраннаго отъ людей Моихъ.

Яко агнецъ незлобивый,\* веденъ бысть царь мученикъ Николай на убиение,\* съ царицею, и чады, и вѣрными слуги,\* и имѣя душу чисту,\* ввѣряя себѣ и присныхъ Богу, никогда же пороптавъ,\* пріять же крѣтко смѣрть за Христа.\* И нынѣ предстоя со ангелы и великимъ сонмомъ новомученикъ на небесѣхъ,\* молишь о спасеніи страны Россійскія отъ лютыхъ безбожниковъ,\* да обратятся къ Богу вси отступившія отъ Него,\* да утвердятся страхъ Божій въ сердцахъ,\* и да возсіяетъ паки вѣра Христова.

**Стихъ:** Елеемъ святымъ Моимъ помазахъ его.

Сія исповѣдаху святіи царственнии мученицы\* предъ неповинною смѣртію за Христа,\* повторяюще святоотеческое завѣщаніе:\* мученицы древнии, иже вѣроваху въ Господа Иисуса Христа,\* на смѣрть идяху яко на праздникъ,\* окрыливше умъ и сердце вѣрою,\* осуждѣни же на смѣрть духъ миренъ имѣяху,\* иже ихъ не оставяше никогдаже,\* мирно бо на смѣрть идяху,\* внити во иную жизнь духовную уповающе,\* яже отверзается за гробомъ.\* Дѣломъ сія словеса испытавше,\* нынѣ святіи царственнии мученицы радуются со Христомъ на

небесѣхъ,\* со дерзновѣніемъ молящеся о душахъ нашихъ.

### **Слава, гласъ 6:**

**Кто** изречетъ труды твоя и страданія?\*  
Стратотѣрпче великій и мучениче царю  
Николае,\* тяжкое бремя власти воспріялъ еси,\*  
не славы ради,\* но яко христіанскій царь и слуга  
Христовъ,\* пекійся о пользѣ народа,\* множество  
скорбей претерпѣвъ.\* Вся сія попусти Господь за  
грѣхи народа,\* и да явитъ благочестіе твоё,\*  
показуя міру терпѣніе твоё,\* яко  
многострадальнаго Іова,\* да получиши славный  
мученической вѣнецъ на небесѣхъ,\* Авелеву  
вѣнцу подобный,\* идѣже нынѣ ликуя со ангелы,\*  
предстательствуеши за ны предъ Богомъ,\*  
моляся о спасеніи душъ нашихъ.

### **И нынѣ, богородичень, гласъ тойже:**

**Творецъ** и Избавитель мой, Пречистая,\*  
Христось Господь изъ Твоихъ ложеснъ  
прошедъ,\* въ мя оболкійся,\* первыя клятвы  
Адама свободи.\* Тѣмже Ти, Всечистая,\* яко  
Божіи Матери же и Дѣвѣ войстинну,\* вопіемъ  
немолчно:\* радуйся ангельски, радуйся  
Владычице,\* предстательство и покрове,\* и  
спасеніе душъ нашихъ.

**Тропа́рь свято́му ца́рю му́ченику Никола́ю,  
гласъ 5:**

Ца́рства земна́го лишэ́ние,\* у́зы и страда́нiя  
многора́зличныя,\* крѣ́тко претерпѣ́ль еси́,\*  
свидѣ́тельствовавъ о Хри́стѣ́ да́же до сме́рти отъ  
богобо́рцевъ,\* страс́тотерпче вели́кий  
Боговѣ́нчаный ца́рю Нико́лае,\* се́го ра́ди  
му́ченическимъ вѣ́нцемъ на небесѣ́хъ\* вѣ́нча́ тя,  
съ ца́рицею, и ча́ды, и слуги́ твоими Хри́сто́сь  
Бо́гъ,\* Е́гоже моли́\* поми́ловати страну́  
Росси́йскую,\* и спасти́ ду́ши на́ша.

**Сла́ва, и ны́нѣ, богоро́диченъ:** Ра́дуйся двѣ́ре  
Госпо́дня...

**Аще бдѣ́ние соверша́ется: тропа́рь два́жды,  
Богоро́дице Дѣ́во, еди́ножды.**

**НА УТРАНИ**

**На Бо́гъ Госпо́дь, тропа́рь свято́му ца́рю  
му́ченику, два́жды.**

**Сла́ва: тропа́рь преподо́бному́ченицѣ́  
княги́ни Елисаветѣ́, гласъ 4-й:**

Крѣ́тость и смире́ние и лю́бовь\* всели́вши въ  
ду́шу свою́,\* усер́дно послужи́ла еси́  
стражду́щимъ,\* страс́тотерпи́це свята́я княги́не  
Елисавето́,\* та́же съ вѣ́рою претерпѣ́ла еси́

страданія и смёртъ за Христа,\* съ мученицею Варварою.\* Съ нею же моли о всѣхъ съ любовію почитающихъ васъ.

**И нынѣ: богородиченъ, гласъ тойже:**

Еже отъ вѣка утаенное,\* и ангеломъ несвѣдомое таинство:\* Тобою, Богородице, сущимъ на земли явися,\* Богъ въ неслитномъ соединеніи воплощаемъ,\* и крестъ волею насъ ради воспріимъ,\* имже воскресивъ первозданнаго,\* спасе отъ смёрти души наша.

**По 1-мъ стихословіи сѣдаленъ, гласъ 7:**

Трижды отвергся Пётръ,\* но принесе слезы покаянія,\* и абіе помилованъ бысть\* и возведенъ въ чинъ первоверховнаго апостола.\* Царь же и великій страстотерпецъ Николаій аще и отречеса отъ престола,\* видя окрестъ себе измѣну и боязнь и обманъ,\* и разумѣя, яко вси ближніи военачальницы и народъ отрекошася отъ него,\* онъ же не отречеса отъ Христа,\* ни отъ любве къ народу своему,\* и не восхотѣ бѣжати отъ богоборцевъ,\* но крѣтко вся претерпѣвъ,\* пріять неповинно мученическую смёртъ за Христа,\* якоже сродницы его благовѣрніи князи Борисъ и Глѣбъ.\* Сего ради молимъ тя, страстотерпче царю,\* молися Христу Богу,\* прегрѣшеній

оставленіе даровати\* прѣзднующимъ любовію  
святую памѣть твою. [Дважды.]

**Слава, и нынѣ: богородиченъ:**

Молитву пріемши отъ насъ,\* въ кровъ Твоѣй,  
Пречистая Дѣво, прибѣгающихъ,\* не престаѣй  
молящи Человѣколюбца\* спастися рабомъ  
Твоимъ.

**По 2-мъ стихословіи съдаленъ, гласъ 7:**

Съ любовію веліею къ неблагодарнымъ людемъ,\*  
принеслъ еси себѣ, великій страсотѣрпче царю,  
въ жѣртву за народъ твой,\* якоже реклъ еси:\*  
аще потребна естъ жѣртва за народъ, азъ жѣртва  
сія буду.\* Больши сея любве никтоже имать,\*  
аще кто душу свою положитъ за други своя.\*  
Нынѣ же предстоя Христу, Емуже послужилъ  
еси,\* моли о насъ, чтущихъ любовію памѣть  
твою. [Дважды.]

**Слава, и нынѣ: богородиченъ:**

Ужасно чудо зачатія и несказаненъ образъ  
рождества\* въ Тебѣ познася, Приснодѣво  
Чистая,\* ужасаесть мой умъ и удивляетъ  
помышленіе.\* Слава Твоя, Богородице, всѣмъ  
бысть радость,\* во спасеніе душъ нашихъ.

## Полиелей и величание:

Величаемъ васъ,\* страсотерпцы святїи царственнїи мученицы,\* и чтемъ честная страданїя ваша,\* яже за Христа\* претерпѣли есте.

**Псаломъ избранный:** Бѣгъ намъ прибѣжище и сила. Помощникъ въ скорбѣхъ обрѣтшихъ ны зѣло. Вмѣнихомся, яко овцы заколенїя.

Проидохомъ сквозѣ огонь и воду и извелъ еси ны въ покой.

### По полиеелїи, сѣдаленъ, гласъ 7:

Егда ты, царю мучениче Николае, царскїй престоль воспрїялъ еси,\* не просилъ еси у Бога богатства имѣнїи, ни славы,\* ниже душъ противящихся тебѣ,\* ниже днїи многихъ,\* но отъ сердца просилъ еси, якоже премудрый Соломонъ, глаголя:\* даждь ми, Господи Боже, премудрость и разумъ.\* Сего ради услыша тя Господь,\* и даде тебѣ по прошенїю твоему,\* являя тя ревнителя о благочестїи,\* мудраго и смиреннаго царя,\* и вѣнча тя за благочестїе славнымъ вѣнцемъ небеснымъ,\* да молишия о православныхъ людехъ,\* предстоя со ангелы святыми на небесѣхъ\* у престола Божїя.

**[Дважды.]**

## **Слава, и нынѣ: богородиченъ:**

Пречистая Дѣво, помилуй насъ,\* прибѣгающихъ  
вѣрою къ Тебѣ милосерднѣй,\* и просящихъ  
теплаго Твоего заступленія.\* Яко матери Бога  
вышняго,\* моли Сына Твоего, Христа Бога  
нашего,\* спастися рабомъ Твоимъ.

**Таже степенна, 1-й антифонъ 4-го гласа.**

**Прокимень, гласъ 4: Тебе ради, Господи,\*  
умерщвляеми есмы весь день. Стихъ:**

**Вмѣнихомся яко овцы заколенія. Всякое дыханіе  
да хвалить Господа. Евангеліе отъ Матѳея,  
зачало 36.**

**По 50-мъ псалмѣ стихира, гласъ 6-й:**

Вѣлію вѣру и дивное терпѣніе,\* и любовь ко  
врагомъ стяжалъ еси,\* святой мучениче царю  
Николае,\* во испытаніихъ на Бога надѣяся,\* во  
страданіихъ долготерпя,\* враговъ и убивающихъ  
тя прощая,\* и прося не мстити за себе,\* понеже  
реклъ еси, яко зло не побѣдитъ зла, но токмо  
любовь,\* и кончину мученическую за Христа  
кратко приѣмля.\* Тѣмже возвеличи ты Христосъ  
на небесѣхъ,\* Егоже моли о вѣрою и любовью  
чтущихъ тя.

**Канонъ Богородицѣ, со ирмосомъ на 6, гласъ 8: Воду прошедь... и святому на 8, плачь царя мученика, егоже краегранесіе: Пощади, Боже, люди согрѣшившія. Гласъ 2.**

**Пѣснь 1.**

**Ирмосъ:** *Грядіте людіе,\* поімъ пѣснь Христу Богу,\* раздѣльшему море и наставльшему людіе,\* яже изведе изъ рабѣты египетскія,\* яко прославіся.*

**Припѣвъ:** *Святіи царственніи мученицы, молите Бога о насъ.*

*Поруганіе зря и разореніе земли своея отъ безбожныхъ врагъ, плакася изъ глубины сердца благочестивый царь, якоже пророкъ Іеремія и тріе отроцы, моляся за люди согрѣшившія и горько стengahше: милостиве Господи, не остави насъ.*

*О, како земля Русская, прежде славная въ мѣрѣ и благодѣнствующая, плѣнена бысть отъ богоборцевъ? вси дружащися съ нею отвергошася ея, быша ей врази. Отринуть есть Господь царя и князя и священника. Виждь, Господи, призри и помилуй.*

*Щедроты Господни бездна многа, не во вѣкъ отринетъ Господь, но помилуетъ смирившихся и*

кающихся по множеству милости Своея и избавить люди Своя, якоже древле Израиля отъ рабства египетскаго.

**Богородичень:** Съ вѣрою и любовію притекающихъ къ Тебѣ и со страхомъ поющихъ Тя, молитвенный гласъ услыши, Владычице.

**Катавасія: Отвѣрзу уста...**  
**Пѣснь 3.**

**Ирмосъ:** *На камени мя вѣры утвердивъ,\*  
разширилъ еси уста моя на враги моя,\*  
возвесели бо ся духъ мой, вегда пѣти:\* нѣсть  
святъ, якоже Богъ нашъ,\* и нѣсть праведенъ,  
паче Тебе, Господи.*

Ангель Хранитель попущеніемъ Божіимъ отъятъ бысть отъ земли Россійскія, врази ея сташа во главѣ, ненавидящии ю благоденствуютъ за множество нечестія прѣжде благочестивыя земли, князи ея пребываютъ въ народѣхъ чуждыхъ. Не отрини, Господи, страждущихъ людей Твоихъ до конца, но обрати и утверди ихъ на камени заповѣдей Твоихъ.

Доколѣ, Господи, путь нечестивыхъ спѣется, доколѣ плакати иматъ земля отъ злобы живущихъ на ней? Архіереи, священницы, князи и вѣрнии людіе низложени и убіени быша.

Доко́лъ, Го́споди, Влады́ко святы́й и и́стинный,  
не су́диши враго́мъ Твои́мъ за кро́вь ихъ?  
Поми́луй и изба́ви всѣхъ на́съ отъ враго́въ  
Твои́хъ и спаси́ ду́ши на́ша.

**И**збавле́нія не иму́щи, ско́рби и стенáнія  
исполнися земля́ пре́жде христоименита́я, во  
страда́нии своёмъ глаго́ля: согрѣши́хомъ и  
беззаконнова́хомъ отступивше́ отъ Тебе́,  
Го́споди, и за́повѣдей Твои́хъ не послу́шахомъ,  
ниже́ соблюдо́хомъ. Обрати́ на́съ, Бо́же, къ  
покая́нью и утверди́ на недви́жимѣмъ ка́мени  
за́повѣдей Твои́хъ.

**Богородиченъ:** Упова́ние и наде́жда на́ша Ты́  
еси́, Пресвята́я Влады́чице, спаси́ стра́ждущее  
оте́чество на́ше, и лю́ди Твоя́ моля́щися и и́мя  
Твое́ призыва́ющія.

**Кондакъ святѣй мученицѣ княгини  
Елисаветѣ, гласъ 4:**

**О**тъ сла́вы ца́рственныя,\* взѣмши крѣсть  
Христо́въ,\* прешла́ еси́ къ сла́вѣ небеснѣй,  
моля́щися за враги́,\* и обрѣла́ еси́ ра́дость  
вѣ́чную,\* свята́я мученице́ княгине́ Елисавето́,\*  
съ Варва́рою мученицею,\* тѣмже моли́те о  
душа́хъ на́шихъ.

## Съдаленъ, гласъ 7:

Страстотѣрпице святая княгинѣ Елисавето,\* еда  
тя живу во Алапаевскую шахту ввергоша,\*  
купно со святыми мученики царскія крове,\* иже  
бяху князие Сергій, Иоаннъ, Константинъ, Игорь  
и Владиміръ,\* такожде мученица Варвара,\* и  
святый мученикъ Θεодоръ,\* изнемогающимъ же  
надолзѣ всѣмъ отъ ранъ,\* облегчала еси еле жива  
сущи страданія умирающихъ,\* воспѣваючи  
священная пѣснопѣнія, яже слышаху  
мимоходящи.\* Сего ради молимъ тя, молися  
Христу Богу\* прегрѣшеній оставленіе даровати\*  
празднующимъ любовію святую память твою.

## Слава, и нынѣ, богородиченъ, гласъ тойже:

Егда предстану предъ лицемъ Создателя моего\*  
въ день праведнаго суда Его,\* тогда, Владычице,  
предстани ми,\* и вѣчныя муки избави мя,\* да не  
сниду во адъ, но да спасуся\* Твоимъ, Пресвятая  
Богородице, заступленіемъ.

## Пѣснь 4.

**Ирмосъ:** *Пришелъ еси отъ Дѣвы, не ходатай,  
ни ангель,\* но Самъ, Господи, воплощся,\* и  
спаслъ еси всего мя, человека.\* Тѣмъ зову Ти:  
слава силъ Твоей, Господи.*

Беззаконія людей Твоихъ велики быша предъ очима Твоима, Господи, сего ради безбожнии врази святилица Твоя оскверниша и разориша, якоже пророкъ Исаія рече: праздниковъ вашихъ ненавидитъ душа Моя, не стерплю грѣховъ вашихъ, егда прострете руки ваша ко Мнѣ, отвращу очи Мои отъ васъ. Приближаются бо Мнѣ людие сіи усты своими, сердце же ихъ далече отстоитъ отъ Мене. Разумѣюще сіе, нынѣ каемся и обращаемся къ Тебѣ, да престанетъ гнѣвъ Твой, да побориши борющіи ны и да речемъ: слава силъ Твоей, Господи.

**О**, како бремя беззаконій народа Твоего, Господи, умножися, Ты отъялъ еси силу нашу, предалъ еси насъ въ руки беззаконниковъ и содѣлашася вси раби. Токмо Ты, единое Господи, можеша, аще хоцеша свободити ны, егда познаемъ грѣхи своя и обратимся къ Тебѣ Создателю нашему и прославимъ Тя.

**Ж**изнь во вѣки блаженная токмо въ Бозѣ есть, но узокъ путь вводяй въ животь. Сія забы народъ Твой, Господи, и не послуша словесе Твоего, Христѣ Царю, но широкимъ путемъ грѣха поиде. Прииде же на ны насиліе и пагуба, изгнаніе и смѣрть, да уразумѣемъ единый истинный путь Твой, Спасителю нашъ, и обратимся и прославимъ Тя.

**Богородиченъ:** Ты еси, Пречистая Богородице, приближище наше и утверждение. Моли Сына Твоего и Бога нашего подати намъ спасение и греховъ оставление.

### **Пѣснь 5.**

**Ирмосъ:** *Свѣта Подателю\* и въковъ Творче, Господи,\* во свѣтъ Твоихъ повелѣній настави насъ:\* разве бо Тебе, иного Бога не знаемъ.*

Егда отринулъ естъ Господь царя и князя и священника, храмы же и жертвенники и святилища Своя не пощадѣ, тогда возскорбѣхъ, сердце мое смятеся во мнѣ, въздыхаю и нѣсть утѣшающаго. Призри, Господи, и пощадѣ, просвѣти ны повелѣніи Твоими, да обратимся къ Тебѣ и послужимъ Ти.

Людіе Твои, Господи, бѣжати вождельша отъ насилія враговъ и не возмогоша, иніи же въ народѣхъ чуждихъ скитаются. Сіе бысть, яко ложніи вожди вѣщаша суету и безуміе и не глаголаху о грѣсѣхъ, да отвратятъ гнѣвъ Божій, плѣненіе и изгнаніе. Нынѣ отверзоша на ны уста своя вси врази наши, поскрежеташа зубы своими и рѣша: поглотимъ ихъ. Возстани, воззови въ нощи, изливай молитву ко Господу, простирая къ Нему рѣцѣ и глаголя: виждь,

Господи, погѣбель нашу, просвѣти, призри и помилуй.

Юноши и дѣвы, старцы и младенцы неповиннии убиени быша, погна врагъ душу мою, смирилъ естъ въ землю животъ мой, посадилъ мя естъ въ темныхъ, яко мертвыя отъ вѣка, и уны во мнѣ духъ мой, во мнѣ смятѣся сердце мое, погѣбе сила моя и надежда моя на Господа. Помяни, Господи, нищету мою и горестъ. Сія глаголахъ въ сердце моемъ, сего ради потерплю страданіе отъ Бога, яко да призритъ Господъ на смиреніе мое.

**Богородиченъ:** Бога, Егѣже родила еси, Пречистая Маріе, моли рабомъ Твоимъ подати прегрѣшеній оставленіе.

### Пѣснь 6.

**Ирмосъ:** *Во глубинѣ грѣховнѣй содержимъ есмь, Спасе,\* и въ пучинѣ житействѣй обуреваемъ,\* но, якоже Іону отъ звѣря,\* и мене отъ страстей возведи и спаси мя.*

Дадѣ Господъ утѣшеніе, яко милость Господня не остави насъ, и не скончашася щедроты Его, обновляются бо на всякъ день. Сего ради будемъ надѣющеся на Бога, Господъ часть наша естъ, пребудемъ уповающе на Него, могущаго

избавити насъ отъ всѣхъ бѣдъ, якоже Іону отъ звѣря морскаго.

**Ищущимъ** Бога благо есть, благо бо Господь надбющимся на Него, благо душѣ въ терпѣннѣи ожидающей спасенія Божія, дающей лице свое бьющему и приѣмлющей поношеніе, яко не на вѣки отринетъ Господь, но избавитъ отъ погѣбели души смирившихся и уповающихъ на Него.

**Согрѣшившимъ** людемъ посла Господь горе, но помилуетъ по величѣй благодости и любви въ попеченіи Своемъ, порази бо и огорчи сыны чловѣческія не отъ изволенія сердца Своего, но егда попраша заповѣди Его, яко отъ Вышняго исходитъ наказаніе и благоденствіе. Да не возропщеть о наказаніи всякъ живущій, да сѣтуеть же о грѣсѣхъ своихъ и восплачетъ, дондеже приклонится и увидитъ Господь съ небесе.

**Богородичень:** Нынѣ къ Тебѣ прибѣгаю, Пречистая, спаси мя молитвами Твоими и соблюди: елика бо хочещи, можещи, яко Мати Всемогущаго.

## Кондакъ, гласъ 6:

Надежда царя мученика съ царицею и чады и слуги укрѣпи,\* и къ Твоей любви окрыли,\* будущий имъ покой предвозвѣстивши,\* тѣхъ молитвами, Господи, помилуй насъ.

## Икосъ:

Зря вѣру Христоу благочестивымъ царемъ во странѣ Россійстѣй укрѣпляему, и не терпя сего, врази Божии погубити христоролюбиваго царя мученика Николая умыслиша, и предаша его неповиннѣй смерти со благочестивою царицею и чады и слуги и со всѣмъ царственнымъ родомъ, но прельстишася, яко путь нечестивыхъ погибнетъ, праведницы же во вѣки живи будутъ, и вмѣсто пагубы и вреда, сотвориша ихъ славныя мученики и заступники предъ Богомъ. Кровию ихъ и новомученикъ всѣхъ страна Россійская, богоборцы угнетаемая, спасена будетъ, понеже кровь сія сѣмя новой жизни во Христвѣ есть, тѣхъ молитвами, Господи, помилуй насъ.

## Пѣснь 7.

**Ирмосъ:** *Образу златому на полѣ Деирѣ служиму,\* триѣ Твои отроцы небрегоша безбожнаго вельнѣя,\* посреде же огня ввержени,*

*ороша́еми, по́яху:\* благословѣ́нь еси́, Бо́же  
оте́ць на́шихъ.*

**Обрати́ ны, Го́споди, къ Тебѣ́, и обрати́мся,  
обнови́ дни на́ша служе́ніемъ Тебѣ́, якоже  
пре́жде, яко благословѣ́нь еси́, и хва́льно и  
прославлено́ и́мя Твое́ во вѣ́ки. Яко пра́веденъ  
еси́ во все́мъ, е́же сотвори́лъ еси́ на́мъ, и вся́  
дѣла́ Твоя́ и́стинна, и пра́ви путе́ Твои́, и вси́  
суди́ Твои́ и́стинни. Сего́ ра́ди душе́ю  
сокруше́нною и ду́хомъ смире́ннымъ глаго́лемъ:  
благословѣ́нь еси́ Бо́же, препѣ́тый и  
превозно́симый во вѣ́ки.**

**Го́споди Бо́же, благословѣ́нь еси́, яко и́стиннымъ  
судо́мъ навѣ́лъ еси́ сія́ вся́ страда́нія на ны́,  
грѣ́хъ ра́ди на́шихъ. Яко согрѣ́шихомъ и  
беззаконно́вахомъ и не соблюдо́хомъ и не  
сохрани́хомъ, якоже заповѣ́далъ еси́ на́мъ, да  
блага́ намъ бу́детъ и да просла́вимъ и́мя сла́вы  
Твоея́ свято́е, препѣ́тое и превозно́симое во  
вѣ́ки.**

**Рѣ́шителю всѣ́хъ долго́въ грѣ́ховныхъ, Го́споди,  
благода́ть пода́ждь прощѣ́нія прегрѣ́шившей  
странѣ́ Росси́йстѣй, ю́же наказалъ еси́ ра́нами  
го́рькими. Оба́че не во гнѣ́вѣ́ Твое́мъ, но по  
мно́жеству щедро́тъ Твои́хъ и неизрече́ннѣй  
ми́лости Твое́й очисти́ зе́млю правосла́вную отъ**

безбожныхъ враговъ, возстави, Щедрый, царя Помазанника Твоего и услыши ны, миръ церкви и спасение людемъ Твоимъ даруй, моли Тя царь страсотерпецъ и весь безчисленный сонмъ новыхъ мученикъ, Единого благословеннаго Бога отецъ нашихъ.

**Богородиченъ:** Богородице Дѣво, рождающая Слово паче слова, Зиждителя Твоего, Того моли съ царемъ великомученикомъ, царицею и чады и слуги и прочими царственными мученики и всеми новомученики Россійскими, помиловати души наша.

### Пѣснь 8.

**Ирмосъ:** *Въ пещь огненную ко отрокомъ еврейскимъ низшедшаго,\* и пламень въ росу преложшаго Бога,\* пойте, дѣла, яко Господа,\* и превозносите во вся вѣки.*

**Шуяго** стоянія избави насъ, Господи, вся къ пользѣ нашей строяй, пославый огненное очищение странъ нашей, да непрестанно зываемъ: благословите вся дѣла Господня Господа.

**Имамы** сокровище велие вѣру святую, юже Христосъ намъ недостойнымъ даде, да сохранимъ ю во благоденствіи и во страданіихъ,

якоже сонмъ великій новыхъ страстотерпецъ даже до смѣрти вѣру сохрани, и да глаголемъ съ ними: Господа пойте дѣла и превозносите во вѣки.

**Возжелавъ** всеблагій Богъ явити крѣпость вѣры и силу терпѣнія царственныхъ мученикъ, даде имъ испити чашу горькихъ страданій и пріяти мученическую смѣртъ, они же не поропташа, но яко агнцы незлобиви не отверзоша устъ своихъ, съ терпѣніемъ же и радостію вся претерпѣша, зывающе: Господа пойте и превозносите во вѣки.

**Богородичень:** Спасенія ходатаица намъ явилася еси, Богородице, рождшая Спаса и Владыку всѣхъ, тѣмже молимъ Тя: избавленіе отъ безбожниковъ исходатайствуй люте страждущей странѣ Россійстѣй, и спасенія сподоби всѣхъ пѣснословящихъ Тя вѣрно во вся вѣки.

### **Пѣснь 9.**

**Ирмосъ:** *Отъ Бога Бога Слова,\* неизреченною мудростію пришедшаго обновити Адама,\* ядію въ тлѣніе падшаго люте,\* отъ Святыя Дѣвы неизреченно воплотившагося насъ ради,\* вѣрніи, единомудренно пѣснями величаемъ.*

**Ш**иро́кій пу́ть грѣ́ха, вво́дяй въ поги́бель, и мнози су́ть вхо́дящи́и ѿ́мъ, рече́ Госпо́дь. Не послу́шаша сего́ евангелѣ́скаго гла́са лю́діе Росси́йстїи, и гнѣ́въ Бо́жїй пости́же ихъ, отъ него́же изба́ви на́съ, Христе́, мо́литъ Тя́ святы́й великомучени́къ ца́рь Никола́й и ѿ́же съ ни́мъ уби́еннїи, и ꙗ́ко Человѣ́колюбе́ць поми́луй и спаси́ ду́ши на́ша.

**И**исусе́ Христе́ Бо́же на́шъ, обрати́ ны́ по мно́жеству ми́лости Твое́я и спасе́мся, при́зри съ небесе́ ми́лостїю и лю́бовїю, и ви́ждь, ꙗ́ко пре́далъ еси́ на́съ въ ру́ки беззако́нныхъ и есмь́ смире́ни по все́й земли́ грѣ́хъ ра́ди на́шихъ. И ны́нѣ́ возсла́дуемъ всѣ́мъ се́рдцемъ, и бо́имся Тебе́, и и́щемъ лица́ Твоего́. Не посра́ми на́съ, мо́литвами святы́хъ ца́рственныхъ страстоте́рпцевъ, но спаси́ ду́ши на́ша.

**Я**ви́, Госпо́ди, си́лу Твою́, мо́литъ Тя́ ца́рь страстоте́рпецъ, изми́ на́съ отъ безбо́жныхъ вра́гъ на́шихъ по чуде́семъ Твои́мъ, и сотвори́ съ на́ми по кро́тости Твое́й и по мно́жеству ми́лости Твое́я, и да посра́мятся вси́ явля́ющїи рабо́мъ Твои́мъ зла́я, и крѣ́пость ихъ да сокруши́тся и да разумѣ́ютъ, ꙗ́ко Ты́ еси́ Госпо́дь Бо́гъ еди́нъ по все́й вселеннѣ́й, сла́вень и спаса́яй ду́ши на́ша.

**Богородиченъ:** Ты еси крѣпость наша, Ты еси похвала и радование, хранительница наша, заступленіе, прибѣжище, предстательница непобѣдимая и покровъ страны Россійскія. Пречистая Богородице, съ царемъ мученикомъ и великимъ сонмомъ новомученикъ моли спасти рабы Твоя.

**Свѣтиленъ:**

Страдавши Тебѣ ради царственнии мученицы, Христѣ,\* многія муки претерпѣша,\* и славныя вѣнцы пріяша на небесѣхъ,\* да молятся о душахъ нашихъ. [Дважды.]

**Слава, и нынѣ, богородиченъ:**

По Бозѣ упованіе имуще на Тя,\* Пречистая Богородице,\* молимъ Ти ся: рождшагося изъ Тебѣ умоли\* даровати миръ вселеннѣй и велию милость.

**На хвалитехъ, стихиры на 4, гласъ 3:**

Агнцы чистыя приведостеся ко Владыцѣ,\* стратотерпцы царственнии мученицы,\* Того молите спасти души наша. [Дважды.]

Раны ваѣша и язвы,\* славнии царственнии мученицы,\* язвы грѣховныя исцѣляютъ всѣхъ

вѣрныхъ,\* святїи страдальцы Господни,\*  
многому терпѣнію навчающе.

Лютыми ранами и страданьми мучими,\* святїи  
царственнїи страсотерпцы,\* не отвергостеса  
истинныя Жизни — Господа нашего,\* ни  
богоборцевъ устрашїстеса,\* тѣмже молитвами  
вашими\* всѣхъ насъ утвердите.

### **Слава, гласъ 6:**

Молитвами, Христѣ, святыхъ мученикъ Твоихъ,\*  
убїенныхъ за вѣру въ Тя,\* великихъ князей:  
Михайла, Павла, Димїтрія и Георгія,\* и вѣрныхъ  
царскихъ слугъ: Іліи, Васїлія и Евгенія,\*  
Анастасїи, Екатерины и Анны,\* Алексїя, Іоанна,  
Климентя, Іоанна и Николая,\* помилуй и спаси  
души наша,\* яко Благъ и Человѣколюбець.

### **И нынѣ, богородиченъ:**

Богородице, Ты еси лоза истинная,\*  
возрастившая намъ плодъ живота,\* Тебѣ  
молимся, молися Владычице со святыми  
царственными страсотерпцы и всѣми  
новомученики,\* помилovati души наша.

**Славословіе великое. Ектенїи и отпусть.**

## НА ЛИТУРГИИ

**Блаженна отъ канона пѣснь 3-я и 6-я.**

**Прокимень, гласъ 4: Тебѣ ради, Господи,\*  
умерщвляеми есмы весь день. Стихъ:**

**Вмѣнихомся яко овцы заколенія. Апостолъ къ  
Римляномъ, зачало 99. Аллилуія, гласъ 1.**

**Богъ намъ прибѣжище и сила, помощникъ въ  
скорбѣхъ обрѣтшихъ ны зѣло. Стихъ: Господи,**

**спаси царя и услыши ны, въ онъже аще день  
призовемъ Тя. Евангеліе отъ Іоанна,**

**зачало 52. Причастень: Радуйтесь праведнии о  
Господѣ, правымъ подобаеть похвала.**

### МОЛИТВА,

**читаема въ день убіенія Царской Семьи, на  
литургии.**

**Благословенъ еси, Господи Боже отецъ нашихъ,  
и хвально и прославлено имя Твое во вѣки, яко  
праведенъ еси о всѣхъ, яже сотворилъ еси намъ,  
и вся дѣла Твоя истинна и прави путіе Твои, и  
вси суди Твои истинни: и судьбы истинны  
сотворилъ еси по всѣмъ, яже навелъ еси на ны.  
Яко согрѣшихомъ и беззаконновахомъ  
отступивше отъ Тебѣ, и прегрѣшихомъ во всѣхъ,  
и заповѣдей Твоихъ не послушахомъ, ниже  
соблюдохомъ, ниже сотворихомъ, якоже  
заповѣдалъ еси намъ, да благо намъ будетъ. И**

предалъ еси насъ въ руки враговъ беззаконныхъ, мерзкихъ отступниковъ, и человекомъ неправеднымъ и лукавнѣйшимъ паче всея земли. И нынѣ нѣсть намъ отвѣрзти усть: студъ и поношеніе быхомъ рабомъ Твоимъ и чтущимъ Тя. Не предаждь же насъ до конца имене Твоего ради, и не разори завѣта Твоего, и не остави милости Твоея отъ насъ. Яко, Владыко, умалихомся паче всѣхъ языкъ и есмы смиренни по всей земли днесь, грѣхъ ради нашихъ. И нѣсть во время сіе начальника, пророка и вождя. И нынѣ, возслѣдуемъ всѣмъ сердцемъ и боимся Тебѣ и ищемъ лица Твоего. Не посрами насъ, но сотвори съ нами по кротости Твоей, и по множеству милости Твоея, и молитвъ ради пречистыя Матере Твоея и всѣхъ святыхъ Твоихъ изми насъ по чудесемъ Твоимъ, и даждь славу имени Твоему, Господи. И да посрамятся вси являющіи рабомъ Твоимъ злая, и да постыдятся отъ всякія силы и крѣпость ихъ да сокрушится. И да разумѣютъ вси, яко Ты еси Господь Богъ нашъ, единъ и славенъ по всей вселеннѣй, аминь.

### **Молитва святому царю мученику Николаю.**

**О**, святыи страстотерпче царю мучениче Николае, Помазанника Своего тя Господь избра, во еже милостивно и право судити людемъ

твоимъ и хранителемъ царства православнаго быти.

Царское служение сіе и о душахъ попечение со страхомъ Божіимъ совершалъ еси. Испытуя же тя, яко злато въ горнилѣ, скорби горькія Господь ти попусти, якоже Іову многострадальному, послѣди же престола царскаго лишение и мученическую смерть посла ти. Вся сія крѣтко претерпѣвый, яко истинный рабъ Христовъ. наслаждаеши нынѣ вышнія славы у престола всѣхъ Царя, купно со святыми мученики: святою царицею Александрою, святымъ отрокомъ царевичемъ Алексіемъ, святыми царевнами Ольгою, Татианою, Маріею и Анастасіею и съ вѣрными слуги твоими, таже со святою мученицею княгинею Елисаветою и со всеми царственными мученики и святою мученицею Варварою.

Но яко имѣя дерзновение вѣліе у Христа Царя, Егоже ради вси пострадаша, моли съ ними, да отпуститъ Господь грѣхъ народа, не возбранившаго убіение твое, царя и помазанника Божія, да избавитъ Господь страждущую страну Россійскую отъ лютыхъ безбожниковъ, за грѣхи наша и отступленіе отъ Бога попущенныхъ, и возставитъ престолъ православныхъ царей, намъ же подастъ грѣховъ

про́щєніє, и на всѣ́кую добродѣ́тель наста́вить на́съ, да стяжи́мъ смире́ніє, крѣ́тость и лю́бовь, я́же сіи мученицы яви́ша, да сподо́бимся небеснаго ца́рствія, идѣ́же кúпно съ тобо́ю и всѣ́ми свѣ́тыми новомученики и исповѣ́дники Росси́йскими просла́вимъ Отца́ и Сы́на и Свята́го Ду́ха, ны́нѣ и прі́сно и во вѣ́ки вѣ́ковъ. Ами́нь.

**Источникъ: Служба свѣ́тымъ ца́рственнымъ мученикомъ: свѣ́тому благовѣ́рному царю́ мученику Николаю, цари́цѣ мученицѣ Александрѣ́, царевичу Алексію́, царевнамъ Ольгѣ́, Тати́анѣ́, Мари́и и Анастасіи́, преподобномученицамъ княгини Елисаветѣ́ и инокинѣ́ Варварѣ́, свѣ́тымъ благовѣ́рнымъ мученикомъ ца́рскаго ро́да и вѣ́рнымъ слуга́мъ съ ними уби́еннымъ. — Мюнхенъ: Изданіе обители преподобнаго Іова́ Почаевскаго, 1996. — 23 с.**

